


TEZAUUR LITURGIC

19 MAI

ACATISTUL SF. CUVIOS IGNATIE DE LA VOLOGDA



MOSCOVA, 2000



Акафист преподобному Игнатию Прилуцкому Вологодскому Чудотворцу

Кондак 1

Избранному Господом от Благоверного княжеского рода и неповинне страдавшему угоднику Христову Игнатию возносим похвалы, яко великого терпения наставнику и нашему пред Богом заступнику, ты же, преподобне, услыши нас зовущих ти:

Радуйся Игнатие, скорый в бедах помощниче и преславный чудотворче.

Икос 1

Ангелов Творец и Господь Сил в Троице Бог прославляемый, предуготовляя тя в сосуд своея благодати, благоволи просветити тя святым крещением от руку преподобнаго Паисия Угличскаго, иже провидя имущую явиться на тебе благодать Божию, нарече тя именем Иоанн. Тебе убо от младенства предуготованному быти вместилищем тоя благодати, приносим похвалы сицевыя:

Радуйся от руку великаго угодника крещенный;
Радуйся измлада благодатию Божиею

приосененный.

Радуйся от юности Богови душею

прилипивыйся;

Радуйся, Слово Божие паче меда и млека
возлюбивый.

Радуйся смирением и кротостию родители твоя
удививый;

Радуйся, и среди самыя мирския суеты
совершенное безмолвие снискавый.

Радуйся отроческая и играия и юношеская
глумления презревый;

Радуйся, плоть свою постом и подвиги духови
покоривый.

Радуйся Игнатие, скорый в бедах помощниче и
преславный чудотворче.

Кондак 2

Видев княжества разоряема и царства земная
погибающа, аще и мал сый возрастом,
исполнился еси совершеннейшаго разума: от
земных бо и тленных ум свой возложил еси к
неизменному Вышнему Царствию, духом
провидя, яко егда восприимеши Его,
неизреченныя радости исполнися, воспоеши:
Аллилуйя.

Икос 2

Разумно уразумев премудрость и славу
Всемогущаго Бога и Творца всяческих, Игнатие

премудре, от младенства преискренне возжелел еси, елико мощно человеку постигнути, совершеннейшую премудрость, юже егда обрел еси, абие вся преходящая мира сего, буйство быти вменил еси. Сея Божественныя премудрости и мы грешнии, страстьми и похотьми обьуродевшии, твоими молитвами сподобитися просяще, взываем ти:
Радуйся ко Слову Божию, яко ко источнику воды жизни устремивыйся;
Радуйся сим юношеский ум твой просветивый.
Радуйся, в творении, аки в зеркале, премудрость и благодать Божию узревый.
Радуйся, разумным созерцанием мира видимаго премирная постигнувый.
Радуйся, суетная научения и ветийства лжемудрых презревый.
Радуйся, Христу, Божией Силе и Премудрости себе всеконечне предавый.
Радуйся, отроча, паче мудрецов, мудрейшее.
Радуйся, юноше, паче старец, целомудрейший.
Радуйся Игнатие, скорый в бедах помощниче и преславный чудотворче.

Кондак 3

Силы телесныя оскудевши, блаженная княгиня Елена, твоя, преподобне Игнатие, мати, и спасительное напутие Пречистых Христовых Таин приявши, прейде от привременных к

Горнему Царствию. О ея же упокоении со святыми моляся, в надгробном рыдании воспевал еси Всесильному Победителю смерти Господу: Аллилуйя.

Икос 3

Имея свыше Божественное прозрение и тайно грядущая провидя духом, проразумел еси, яко земнаго царствия князь никогда же будеши, небесное же, яко никим же отъемлемое, восприяти предзря, начал еси едино по друзем вся чувства твоя преогорчевати, и тело постом и молитвами удручати, поучения Божественного и псалмопения никогда же оставляя, сия подвиги твоя мы грешнии ублажающе, зовем ти:
Радуйся, тленное и преходящее княжество изменивый на вечнующее и неразоримое.
Радуйся, Царствие обретый, его же Царь пребывает неизменен.
Радуйся, пощению Крестителя подражавый.
Радуйся, безмолвию Антониеву обучивыйся.
Радуйся, лествицу Иоаннову возлюбивый;
Радуйся тою вся дни живота твоего восходивый.
Радуйся, с Павлом непрестанно моливыйся.
Радуйся, с Давидом в заповедях Господних поучавыйся день и ночь.
Радуйся Игнатие, скорый в бедах помощниче и преславный чудотворче.

Кондак 4

Бури и треволнения страны нашея сильным твоим ко Господу предстательством укроти, преподобне чудотворче Игнатие, шатания еретическая низложи, о благостоянии Святыя Православныя Церкви, дерзновение яко имеяй, не престани моляся, и нас недостойных памяти твоей собравшихся восхвалити твоя труды и терпение, небесным своим благословением благословив, освяти, яко да достойни будем зывати ко Господу: Аллилуйя.

Икос 4

Слышав, яко родитель твой всажден есть в темницу, и разумев, яко и ты с братом твоим Димитрием сродницы, завистию движими, имут заточити, не восскорбел еси духом, паче же возрадовался еси. Ведом же в темницу, яко в чертог царский, шествовал еси, ликуя и радуяся, яко тою избудеши страшныя темницы во он век. Дивимся твоему великому терпению, и славяще укрепившаго ты Христа Господа, хвалебно зовем ти:

Радуйся, Христову терпению обучивыйся.

Радуйся, Иовлево лишение подъемый.

Радуйся, напастьми непреодоленный;

Радуйся скорбьми не низложенный.

Радуйся темницу яко лествицу во Царствие Небесное стяжавый.

Радуйся, смрад и гной темничный неослабно претерпевый.

Радуйся, никогда же о сем пороптавый.

Радуйся, озлоблявшия тя благословивый.

Радуйся Игнатие, скорый в бедах помощниче и преславный чудотворче.

Кондак 5

Боготечную тя, яко видев звезду, сущих в темнице и приходящих в ню осиявающую, человеконенавистник сый искони, диавол, восхоте погасити ю: вооружи бо на тя сердце великого князя, иже от Углича и Белоозера до града Вологды доведе тя, затвори во внутреннейшей смрадной темнице, узы железными тяжкими обложив. Ты же преподобне посрамил еси вся коварствия вражия, никакоже когда проглаголав стропотная, но, молитву усугубив, взывал еси: Аллилуйя.

Икос 5

Видев, преподобне Игнатие, себе всеми оставленна и забвенна, не восскорбел, ниже возроптал еси, уведев же от Священнаго Евангелия, яко иже слышат Слово Божие и творят Е, братия и сродницы Христовы суть, потщался еси ниже йоту едину от законных оставить неисполнену, разумея, яко, егда

сотвориши вся сия, постигнеши любовь и радость неизреченную, ея же око не виде и ухо не слыша, ниже на сердце когда кому взыде. Ублажающе таковая твоя исправления, зовем ти:

Радуйся Святаго и Освященнаго Евангелия изучителю теплейший.

Радуйся, писанных в нем исполнителю усерднейший.

Радуйся, сродники своя, святая Божия положивый.

Радуйся, друже Божий и угодниче Христов.

Радуйся, вся заповеди Божия возлюбивый;

Радуйся куюждо их исполнивый.

Радуйся, любовь к Любящему тя возложивый;

Радуйся, сего ради неизреченная благая постигнувый.

Радуйся Игнатие, скорый в бедах помощниче и преславный чудотворче.

Кондак 6

Проповедником Христова терпения явился еси пред скорбящим братом твоим Димитрием, преподобне страдальче Игнатие, утешая и вразумляя его, яко страсти нынешняго века недостойни суть к хотящей явиться в нас славе во он век. Паче же страдания самого Искупителя мира пред ним изобразуя. И тако

неослабно от силы в силу возводил еси его,
вопия: Аллилуйя.

Икос 6

Возсия тебе, в темных внутреннейших темницы
пребывающу, свет незаходимый Христос
Господь, своими на кресте искупительными
страданьями: Его же егда в сердце начертал на
древе висяща, абие уразумел еси, яко вся в
житии сем бываемая лютая ходатайствуют нам
вечная благая. Их же мы, воспевающи тя,
твоими молитвами сподобитися чающе, взываем
ти:

Радуйся, Христа распятого выну пред собою
предзревый;

Радуйся, страданием Его сприобщивыйся.

Радуйся, в обстояниих знаменем крестным себе
укреплявый;

Радуйся, и брата твоего семуже научивый.

Радуйся, тому во озлоблении ангел утешитель
бывый;

Радуйся, сему мрак и тяготу темничную
разгнавый.

Радуйся, и нам любящим и чтущим тя помогаяй;

Радуйся прошения наша предваряй.

Радуйся Игнатие, скорый в бедах помощниче и
преславный чудотворче.

Кондак 7

Хотящих нас грешных и малодушных уведети, откуда бе тебе преподобне Игнатие, толико твердая сила Божественная во озлоблении, таинственне возводиши пред образ Владычицы Богородицы всех скорбящих радости, духом сказуя, яко Та есть наша утешительница и помощница в напастех и скорбех, от всякого лица всякую слезу отъемлющая. И научаеши купно прославляти рождшагося от Нея Спаса нашего Бога, взывая ему: Аллилуйя.

Икос 7

Новая дивная знамения показа на тебе Господь, святе Игнатие, вся бо спасительная тридесять три лета, яко виде тя страданьми неослабне совершивша, абие благоволи душу твою извести из земныя темницы, и неизреченная небесная благая тебе даровати, возболел бо еси телом, духом же возжелел еси зело на последок дний своих сподобитися восприть великий ангельский образ. Воспевающе таковое твое великое терпение, глаголем:

Радуйся, память смертную выну имевый.

Радуйся, постом, молитвами и слезами темницу освятивый.

Радуйся, союзники твоя, лютыя разбойники и тати, умиливый.

Радуйся, тыя к обращению приведый.

Радуйся покаянию истинному их научивый.
Радуйся, богоразумием их озаривый.
Радуйся, желанья Божественнаго исполненный.
Радуйся, Божиею благодатию осененный.
Радуйся Игнатие, скорый в бедах помощниче и
преславный чудотворче.

Кондак 8

Странную всех земных вещей, Божественную
одежду священныя схимы, игумен обители
Прилуцкия Мисаил возложив на тя, предивне, и
Игнатием нарек, возгласи Всесовершенному
Человеколюбцу Господу: Аллилуйя.

Икос 8

Весь исполнился еси неизреченныя радости,
егда восприял еси вся спасительная оружия
Божия, противу лютых, по исходе души от тела
путедержателей, и Пречистых Христовых Таин,
напутие спасительное прияв, брата же своего, до
конечного издыхания претерпети
приключшаяся увещав, и молитися за него и за
вся люди обещаваая, предал еси святую душу
твою в руке Божии. Таковыя христианския
кончины твоими молитвами сподоби и нас
грешных, святче Божий, да зовем ти:
Радуйся, яко свято и праведно на земли, пожил
еси.
Радуйся, яко вся приключшаяся тебе злая до

конца претерпел еси.

Радуйся, яко кончину праведную улучил еси.

Радуйся, яко память твоя с похвалами и успение со святыми.

Радуйся, яко отверзошася тебе врата райская, и вшел еси в радость Господа своего.

Радуйся, яко силы небесныя сретоша тя воспевающе радостная.

Радуйся, яко душу твою Жизнодавец Христос прият в небесная селения.

Радуйся, яко и тело твое на земли прославися нетлением и чудесы.

Радуйся Игнатие, скорый в бедах помощниче и преславный чудотворче.

Кондак 9

Вси иноцы обители Прилуцкия, и от града Вологды со иереи вкупе христоролюбивии людие, и окрестных весей обитателей множество много зело со светильники и свещами, стечеса вознести твое, преподобне, многострадальное тело от темницы к месту упокоения вечнаго. Еже и принесше во храм обители Святаго Спаса, иже на Прилуцех, положиша у ногу мощей чудотворца Димитрия, вопиюще: Аллилуйя.

Икос 9

Витии суемудрыя, безумни суще, обьюродевшими умы своими никогдаже

возмогут постигнуть, како тело твое, преподобне Игнатие, естеством своим смертно суще, не точию не причастно тлению устройся, но чудеса преславная источает! Еще бо несену сущу ему к месту погребения, одержимый болезнию смертною и расслабленная, точию егда коснушася ему, абие исцелеша. Мы же, не точию сия добре исповедающе, но и видяще в сих знамение всех воскресения, в последний страшный день быти имущаго, ублажающе тя таковаго чудотворца, взываем:

Радуйся, блаженне и предивне, яко источаеши нам чудеса преславная.

Радуйся, яко расслабленную возставивый.

Радуйся, болезнию смертною одержимаго спасый.

Радуйся, око болящее уврачевавый.

Радуйся, слепоту телесную вкупе и душевную отгнавый.

Радуйся, руки слячение исправивый.

Радуйся, инока Гурия исцеливый.

Радуйся, и доньне чудодействуяй предивне.

Радуйся Игнатие, скорый в бедах помощниче и преславный чудотворче.

Кондак 10

Спасение вечное унаследити от всея души и помышления желающе, тебе, преподобне отче Игнатие, молимся: укрепи нас прочее время

жизни нашего в покаянии скончати и молися сподобитися нам благия христианския кончины, и по смерти услышати поющих: Аллилуйя.

Икос 10

Стены надгробия твоего неблагоговейно созидаю, Давид каменодел, утруждаю, восседе на честней раце твоей. Ты же, преподобне, не терпя сего, и почитати Божию силу, во святых твоих мощех обитающую, научая, поразил еси его лютою болезнию. Егда же той, уведев свое прегрешение, принесе покаяние истинное, Милостивому Владыце Христу подобяся, абие исцелил еси его. Дивящися о сих, взываем тебе таковая:

Радуйся, буйх наказателю.

Радуйся, немудрых умудрителю:

Радуйся, неверия и кощунства искоренителю.

Радуйся, милости источниче:

Радуйся, всепрощения образе.

Радуйся, терпения правило:

Радуйся, смирения законоположниче.

Радуйся Игнатие, скорый в бедах помощниче и преславный чудотворче.

Кондак 11

Пение наше хвалебное сие, тебе, преподобне отче Игнатие, приносимое, не презри, но прием е, вознеси ко Всемилоостивому Владыце, и

молися Ему о благостоянии Святыя Православныя Церкви, и о спасении всех христиан, верою поющих: Аллилуйя.

Икос 11

Светозарною зарею, мрак и тяготу темничную разгоняющую, явился еси и по преставлении твоём, угодниче Божий, страдальче неповинне Игнатие, брата бо твоего Димитрия, всеми оставленна и забвенна, ты Божественною твоею лучшею и совершеннейшею паче земныя, небесною любовью присещая, никакоже оставил еси его, дондеже и той предав свою душу в руке Божии, вкупе с тобою водворися в светлейших и пространнейших скиниях райских, взывая тебе: Радуйся, радости неизреченныя наслаждайся: Радуйся, благодати Божия преестественныя сподобивыйся.

Радуйся, во обителях нерукотворенных водворивыйся:

Радуйся и во храмах неразоримых ликовствуй.

Радуйся, трисвятаго со ангелы пения общниче:

Радуйся, Триипостасное Божество лицем откровенным созерцавый.

Радуйся, и к земным прошениям приникаяй:

Радуйся, верою чтущия тя в сонних и видениях посещаяй.

Радуйся Игнатие, скорый в бедах помощниче и преславный чудотворче.

Кондак 12

Благодать Божественная свыше тебе,
преподобне Игнатие, даровася, еже неповинно в
темнице страждущия избавляти, наипаче же
Церкви ради Христовы и веры Православныя, в
изгнаниих и заточениих сущия утешати. Тем же
и мы недремлющею и лютою бесовских полчищ
стражею обстоими и крепчайшею, паче
каменныя, страстей и похотей своих темницею
отвсюду одержимии, вериги же тяжкими
небрежения и лености связаннии, и во мраце
отчаяния сущии, и ни откуду же помощи
улучити надеющиеся, взываем ти: от сих всех
свободив, подаждь нам непреткновенне
воспевати: Аллилуйя.

Икос 12

Поюще многая твоя злострадания и чудеса,
преподобне отче Игнатие, смиренно просим тя:
в час последний и страшный, егда убогия наши
души имут от тела распрягаться, явлься тогда,
разгони темная и грозная бесовская полчища.
На воздушных же мытарствах буди спутьствууй
и защищай нас. Наипаче же в день Страшнаго
Суда Божия яви нам многомоцное твое
заступление, да зовем ти:
Радуйся, многострадальче, наша страдания
утоляй:
Радуйся, безкровный мучениче, от мучительства

страстей нас изымаяй.

Радуйся, благоверный княже, от прелести князя тьмы нас свободяяй:

Радуйся, постниче, глад душевный наш насыщяяй.

Радуйся, утешителю, печали наша в радость пременяяй:

Радуйся, затворниче, путь ко спасению нам указавый.

Радуйся, подвижниче, смирению и кротости нас научаяй:

Радуйся, девственниче, от пороков и страстей нас охраняяй.

Радуйся Игнатие, скорый в бедах помощниче и преславный чудотворче.

Кондак 13

О, предивный и многострадальный угодниче Божий и чудотворче, преподобне отче наш Игнатие, утешителю всех скорбящих и страждущих! Приими сие от нас ныне приносимое тебе пение, и молися

Всемилоствому Владыце и Господу, да ниспослет Всеблагий Человеколюбец Церкви Православней тишину, стране Российстей благостроение и мирное благоправление, наипаче же отступившия от святых

Православных веры, да обратит на путь истинный, да и тии с нами вопиют: Аллилуйа.

МОЛИТВА

О богомудрый пастырю и наставниче наш, преподобне отче Игнатие! услыши нас грешных, молящихся тебе и призывающих на помощь скорое предстательство твое. Виждь нас немощных, в толицех обстояниих сущих, отвсюду уловляемых, всякаго блага лишенных и умом от малодушия помраченных; потщися, угодниче Божий, не оставити нас в греховном плену быти, да не будем в радость врагом нашим и не умрем в лукавых деяниях наших. Моли Всемилостиваго Владыку, Господа Бога и Спаса нашего Иисуса Христа, Ему же ты со бесплотными лики предстоиши, да благословит и сохранит град наш и святую обитель сию в мире и тишине, нам же всем да подаст благодатию своею грехов оставление, жития исправление, недугов исцеление, от бед избавление, от искушений избытие и освобождение, в скорбех утешение, в нуждах благовременную помощь; наипаче же в вере преспеяние, в надежде утверждение, в любви возрастание, душ наших спасение, яко и во временем сем житии и в вечном Его царствии выну приносим Ему славу, честь и поклонение со Безначальным Его Отцем и Пресвятым и Благим и Животворящим Его Духом, во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**